



# No tin un ret di protekshon sosial pa Hulanda karibense

Falta di stòk stratégiko na Boneiru, Sint-Eustatius i Saba

2026



Algemene  
Rekenkamer

# Anekso

## 1. Resúmen | 3

## 2. Stòk stratégiko na Hulanda karibense | 5

2.2 Gran dependensha di importashon i kadena | 9

2.3 Falta di maneho i divishon di responsabilidadat | 11

## 3. Reakshon di e minister i epílogo di Algemene Rekenkamer | 14

3.1 Reakshon di minister di Asuntunan interno i Relashonnan di Rèino | 14

3.2 Epílogo di Algemene Rekenkamer | 16

## Anekso | 18

Anekso 1 Tokante e investigashon akí | 18

Anekso 2 Literatura | 19

# 1. Resúmen

Seguridat di e islanan Boneiru, Sint-Eustatius i Saba ta wòrdu menasá di diferente manera. Por ehèmpel dor di orkan òf erupshon di un volkano. Na aprel 2026 tin un menasa mundial di eskases di kombustibel, pa kousa di seramentu di e asina yamá Straat van Hormuz na Oriente Medio. Anto na yanüari 2026 e situashon geopolítico na Venezuela (70 kilometer banda di Boneiru) tabata asina frágil ku temporalmente e aerolineanan hulandes a para nan biahenan di i pa e área karibense. Un medida ku habitante di e área karibense ta sinti mésora, ya komo e islanan ta kasi kompletamente dependiente di importashon. Pues pa e habitantenan di Hulanda karibense ta importante ku tin suficiente awa (di bebe), kuminda, kombustibel i remedi na e islanan.

Den nos investigashon di hustifikashon e aña akí, nos a investigá e maneho ku minister di Asuntunan Interno i Relashonnan di Rèino (BZK) a tene rondó di e stòk stratégiko na Hulanda karibense na 2025. Un stòk stratégiko ta un stòk èkstra òf reserva ku únikamente ta wòrdu usá na momentu ku e abastesementu wòrdu interumpí pa un krísis. Nos a investigá komestibel, kombustibel, awa (di bebe) i remedi. Nos konklushon ta ku na e islanan BES no tin stòk stratégiko. Nos ta haña esaki preokupante.

Na momentu ku un isla no tin suficiente stòk stratégiko, esaki por tin konsekuensha sosial grandi. Ora e abastesementu stanka, eskases ku por influenshá bida diario ta surgi rápidamente. Manera rèki bashí den supermerkado. Anto riba esei mester konta ku ta produsí masha tiki kuminda na e islanan mes. Tambe ta asina ku suministro di koriente por wòrdu afektá.

No tin stòk stratégiko. P'esei nos a traha un mapa ku ta indiká kua stòk regular tin na e tres islanan. Tin basta kombustibel i remedi, pero tin masha tiki awa (di bebe) i komestibel fresku. Si den un situashon di krísis e suministroo di awa òf e abastesementu semanal di produkto fresku kai afó, e habitantenan di e islanan por hasi masha tiki. Lihé nan por dependé di partido privá tantu pa awa (di bebe) komo pa kuminda.

E minister di BZK ta kordiná e maneho di reino pa Hulanda karibense. Pero apénas tin maneho pa stòk stratégiko na Hulanda karibense. P'esei no tin palabrashon kla entre atministrashon públiko, e gobièrnunan insular, partido privá i e sektornan vital. No tin klaridat pa loke ta trata ken tin kua responsabilidat.

Nos ta rekomendá e gabinete pa establese kuantu stòk stratégiko mester tin na Hulanda karibense. Tambe pa e disidí ken ta responsabel pa esaki. Ademas nos ta rekomendá e gabinete pa sòru mas pronto ku ta posibel pa un stòk di kuminda i awa (di bebe) na e islanan.

**Kontenido di e rapòrt akí ta parti di e asina yamá verantwoordingsonderzoek 2025 di Relashonnan di reino (IV) i BES-fonds (H).**

## 2.

# Stòk stratégiko na Hulanda karibense

E aña akí den nos investigashon di hustifikashon nos a investigá e maneho di e minister di BZK pa loke ta trata e stòknan stratégiko na Hulanda karibense na 2025. E minister di BZK ta kordiná e maneho di reino pa Hulanda karibense. Por ehèmpel ta asina ku e ministerio di BZK ta hasi palabrashon tokante i ta invertí den desaroyo ekonómiko, infrastruktura i provishon pa Hulanda karibense. Na 2025 a gasta €9.000 na seguridat di alimentashon pa tur seis isla. Pero no a usa e sèn akí spesifikamente pa stòk stratégiko. Pa e periodo di 2025 te 2028 a pone un total di €24 mion disponibel pa hisa seguridat di alimento na e partinan karibense di Reino. Den pasado Algemene Rekenkamer ya a ehikutá un investigashon (di enfoke) na e stòknan stratégiko (Algemene Rekenkamer, 2022). Den e tempu ei nos a wak e situashon na Hulanda europeo, anto e biaha akí nos ta wak e stòk stratégiko na Hulanda karibense.

Na Hulanda karibense tin diferente menasa di seguridat. Por pensa riba menasa natural manera orkan òf erupshon di volkano na Saba i Sint-Eustatius. E situashon rondó di Venezuela (riba un distansha di 70 kilometer for di Boneiru) tambe ta frágil. Riba 3 di yanüari 2026 Merka a ehikutá diferente atake riba diferente ophetivo na Venezuela. Durante esaki nan a detené presidente Maduro i bai kuné Merka (NOS, 2026). Pa motibu di e situashon akí kompania aéreo hulandes temporalmente a para tur buelo di i pa e área karibense. Pa motibu di e menasanan akí i esnan relashoná ku naturalesa, stòk stratégiko ta di un importansia supremamente grandi pa Boneiru, Sint-Eustatius i Saba. E aña akí nos a investigá e tema akí denter di e tema seguridat di e investigashon di hustifikashon.


Bou di regulashon di Union Europeo, Hulanda tin obligashon pa mantené sierto stòk stratégiko. Pa loke ta trata kombustibel, Hulanda ta hasi esei pa medio di Stichting Centraal Orgaan Voorraadvorming Aardolieproducten (COVA) (Wet voorraadvorming aardolieproducten 2012). Sinembargo e regulashon di Union europeo akí no ta konta pa Hulanda karibense. Gobièrnu hulandes no a stipulá stòk stratégiko pa Hulanda karibense. Nos investigashon ta konfirmá ku no tin stòk stratégiko pa Hulanda karibense. P’esei den nos investigashon nos por a konstatá únikamente e situashon real di stòk stratégiko. Den anekso 1 di e rapòrt akí por lesa un hustifikashon ámplio di e investigashon.

## 2.1 No tin stòk stratégiko pa Hulanda karibense

Nos ta konkluí ku no tin stòk stratégiko di awa (di bebe), kuminda, remedi i kombustibel na Hulanda karibense (wak figura 1). Bou di stòk stratégiko ta referí na stòk èkstra òf reserva di materia prima ku ta tene tras di man. E stòk akí no ta pa uso normal, anto e ta wòrdu utilisá únikamente na momentu ku abastementu wòrdu interumpí pa motibu di un krísis.

**Figura 1** Bista general di e stòknan na Hulanda karibense

### No tin stòk stratégiko na Hulanda karibense



Ya komo no tin stòk stratégiko, nos a disidí pa duna un bista di e stòk regular. E diferensia entre e dos tiponan di stòk ta, ku no ta tene stòk regular tras di man. Stòk regular tei pa uso normal. Poniendo e stòk regular den e investigashon akí, nos ta hasi e riesgonan i dependensia di Hulanda karibense visibel.

Ounke no ta kumpli ku e norma di stòk stratégiko, nos ta mira ku na e islanan tin un stòk relativamente grandi di kombustibel i remedi. Esaki kontrali na awa (di bebe) i kuminda, di kua su stòk regular ta limitá. Akibou nos ta deskribí nos konklushonnan.

## **Awa (di bebe)**

E lei Elektriciteit en drinkwater BES, ta definí awa di bebe pa emergensia komo: awa di bebe ku ta wòrdu poné na disponibilidad na momentu ku tin un perturbashon ku ta dura mas ku 24 ora. Si e perturbashon dura mas ku 12 ora, e distribuidor di awa di bebe mester ofresé un alternativa pa ministrashon. Segun nos kuadro di norma, ku ta basá riba norma (internashonal) pa stòk stratégiko, pa loke ta trata awa (di bebe) mester tin un stòk stratégiko di 10 dia. Na niun di e tres islanan; Boneiru, Sint-Eustatius, ni Saba no tin un stòk stratégiko. Figura 2 ta mustra ta kua e stòk regular ku tin di awa (di bebe) ta.

- Na Boneiru no tin un stòk stratégiko komo ku e stòk no ta wòrdu ministrá denter di e infrastruktura eksistente. Na momentu ku uso ta normal, sí tin un stòk regular di awa (di bebe) pa 3 te 4 dia.
- Pa loke ta trata Sint-Eustatius tambe ta konta ku e kompania di awa di bebe no tin un stòk stratégiko, pero si un stòk regular pa 7 dia, na momentu ku e uso ta normal.
- Saba tampoko ta konta ku un stòk stratégiko. Na e isla akí e stòk regular ta esun di mas abou. Esaki ta konsistí di 600 boter di 5 galòn. Esaki ta suficiente pa por ministrá kada habitante di e isla pa 1 dia ku awa di bebe.

Nos konklushon ta ku no tin stòk stratégiko di awa (di bebe), anto ku e stòk regular ta limitá.

## **Kuminda**

No tin un maneho spesífiko pa loke ta trata kuminda. Sigun nos kuadro di norma, ku ta basá riba stòk stratégiko (internashonal), mester tin un stòk stratégiko di 7 dia. Hulanda karibense no ta kumpli ku esaki. E stòknan regular di kuminda ku nos a reuní i klasifiká, ta konsistí di kuminda fresku i kuminda ku no ta dañá lihé. Pa tur isla ta konta ku kada siman ta hasi entrega di kuminda pa medio di karga aéreo i/òf via laman. Figura 2 ta mustra e stòk regular presente.


- Na Boneiru tin un stòk regular di kuminda fresku pa un promedio di 2 pa 3 siman. Loke un supermerkado ta pidi, ta dependé di loke bende e siman ei. E stòk di kuminda ku no ta dañá lihé, ta mas grandi ku esun fresku. Pero no ta bon kla kon grandi esaki ta esaktamente.
- Na Sint-Eustatius tin un stòk regular di kuminda fresku di mas o ménos 1 siman. Na Sint-Eustatius tampoko no ta kla ta kuantu stòk di kuminda ku no ta dañá lihé tin.

- Kálkulo bruto ta mustra ku na Saba tin stòk di 3 luna di komestibel ku no ta dañá lihé. Pa loko ta trata produkto fresku, Saba tin 1 siman di stòk.

Nos ta konkluí ku no tin stòk di kuminda stratégiko, anto ku e stòk di kuminda regular na Sint-Eustatius i Saba ta limitá.

**Figura 2** Kandidat di stòk regular presente na Hulanda karibense

**Stòk regular di awa (di bebe) i kuminda fresku na Hulanda karibense ta limitá**



\*na e produktor di awa

**Kombustibel**

Pa kombustibel no tin un maneho spesífiko. Sigun nos kuadro di norma, ku ta basá riba norma (internashonal) pa stòk stratégiko, mester tin un stòk di 72 ora. No ta kumpli ku esaki. Loko sí ta konta pa tur tres isla ta, ku tin un stòk regular grandi. Kombustibel tin un papel importante den hinter e kadena di produkto. Ta asina ku kombustibel ta nesesario pa generá elektrisidat, diferente fasilidat di emergensia, transporte, anto pa tene remedi friu.

Nos ta konkluí no tin un stòk stratégiko di kombustibel, pero ku sí tin un stòk grandi regular di kombustibel.

**Remedi**

Saba, Sint-Eustatius i Boneiru mester kumpli ku e lei Geneesmiddelenvoorziening BES. E lei akí ta deskribí eksigensia i regla ku botikario mester kumpli kuné ora ta trata di por ehèmpel: trahamentu, wardamentu i uso di remedi. Sigun nos kuadro di

norma, ku ta basá riba norma (internashonal) pa stòk stratégiko, mester tin un stòk pa 7 dia. Anto no ta kumpli ku esaki.

- Hòspital na Boneiru tin un stòk regular di remedi pa 4 te 6 siman. Banda di esei e botika públiko ta mantené un stòk mínimo pa 3 te 6 siman. Ta mónitòr entrega i stòk di e remedinan akí den un sistema di botikario europeo hulandes.
- Na Sint-Eustatius tin un stòk regular di remedi pa mínimo 1 te máksimo 2 luna.
- Na Saba tin un stòk regular di remedi pa mínimo 1 te máksimo 2 luna.

Nos ta konkluí ku no tin un stòk stratégiko di remedi, pero ku sí tin un stòk regular grandi presente.


## 2.2 Gran dependensha di importashon i kadena

Tur stòk na Hulanda karibense ta dependé di importashon. Esaki ta tuma lugá pa medio di *hub* regional na Kòrsou i Sint-Maarten. Ta importá remedi for di Hulanda europeo. Kuminda ta wòrdu importá for di Hulanda europeo, Santo Domingo, Colombia òf Miami. Tambe ta importá kombustibel.

Pa motibu di e dependensia di importashon e infrastruktura fasilidat vital na e islanan BES ta vulnerabel di manera struktural (figura 3). Ta nota kualke interupshon den e logístika internashonal mésora. Debí na – entre otro – kadena di suministro largu i kompleho di e importashonnan, esaki konsekuentemente tin gastu mas haltu di transporte i almasenahe. E konsekuensha ta ku e produktonan importá ta mas karu pa e konsumidó. E dependensia di importashon ta sòru tambe ku e islanan tin un espasio limitá pa aktua den un situashon di krísis. Ya komo por surgi un situashon den kua ta kompetí ku otro isla den region pa por haña e produktonan ku tin eskases di nan, anto no ta resultá evidente ta kua isla ta haña prioridat serka e provedornan.

**Figura 3** Hulanda karibense ta dependé mashá di importashon


Na momentu ku tin interupshon den e kadena, e islanan no ta risibí merkansia



Dependensia di kadena tambe ta hunga un papel grandi den stòk na Hulanda karibense. Un kompania òf organisashon por tin su propio stòk na òrdu, pero e no tin bista riba vulnerabilidad otro kaminda den e kadena. Por sosodé ku e no tin bos den esun parti di e kadena ku e ta dependé di dje. Den kaso ku por ehèmpel surgi un skarsedat di kombustibel, esaki tambe ta sòru pa problema den suministro di koriente, anto konsekuentemente ku produkshon di awa. Esei ta sòru pa problema den almanesamentu di kuminda i remedi. Sin koriente, e instalashonnan pa fria i fris no ta funshoná mas, anto un parti di e stòk di komestibel ta bai pèrdí. Ta hasi uso limitá di solo i bientu pa generá koriente na e islanan. Esaki ta hasi ku dependensia di kombustibel ta keda. Figura 4 ta demostrá ku kombustibel ta e parti esensial den e kadena di suministrashon di stòk.

**Figura 4** Kadena di suminstrashon di kombustibel pa Hulanda karibense

### Kombustibel ta krusial den e kadena di suminstrashon di stòk (stratégiko) pa Hulanda karibense



## 2.3 Falta di maneho i divishon di responsabilidad

Apénas tin maneho di e gabinete òf e tres entidatnan públiko pa loke ta trata stòk stratégiko na Hulanda karibense. Únikamente pa awa (di bebe) tin lei i legislashon ku ta indiká kuantu awa di bebe mester tin na momentu ku tin un emergensia i distribushon wòrdu interumpí. Komo no tin maneho, no tin palabrashon kla pa sa ken ta responsabel pa kiko, entre atministrashon públiko, partidonan privá, sektor vital i e entidatnan públiko. Anto kaminda sí tin palabrashon formal, manera pa loke ta trata kombustibel, nos ta mira ku no tin klaridat den práktika, pa loke ta trata e reparto di papel. Sigur den bista di e dependensia di kadena, un divishon di responsabilidad i kordinashon bon kla, ta di gran importansha pa sigurá stòk. Konsekuensha ta ku den tempu di krísis, e partidonan privá i komersial ta determiná loke ta sosodé ku e suministro regular di awa (di bebe), kombustibel i alimento.

## 2.4 Konklushon i konseho

No tin stòk stratégiko na Hulanda karibense. Loke sí tin, ta stòk relativamente grandi di kombustibel i remedi. Pa loke ta trata awa (di bebe) i kuminda, no únikaamente no tin stòk stratégiko, pero tambe tin stòk regular limitá. Ademas e stòknan regular ta dependé masha di importashon i di e partnernan den e kadena. Banda di esaki falta

di divishon di responsabilidadat na Hulanda karibense, ta sòru pa no tin klaridat pa loke ta trata ta serka ken, anto na unda, e responsabilidadat ta kai. Esaki ta sòru ku den momentu di un krísis siudadano ta dependé di partido privá pa loke ta trata kuminda, awa (di bebe), kombustibel i remedi.

Dependencia di importashon i dependencia bou di partidonan, ta hasi ku stòk stratégiko ta mas importante na e islanan si kompará esaki ku Hulanda europeo. Falta di esaki ta hasi ku Hulanda karibense ta masha vulnerabel na momentu ku tin interupshon di suministro. Pues presensia di stòk stratégiko na Hulanda karibense ta di gran importansha.

Na momentu ku un isla no tin suficiente stòk stratégiko, esaki por tin konsekuensha sosial grandi. Na momentu ku interumpí e suministro òf no tin suministro, por surgi eskases lihé. Anto esaki por afektá bida diario direktamente. Por pensa riba, por ehèmpel, rèki bashí den supermerkadu. Sigur den e konteksto di tiki produkshon di komestibel na e islanan. Ademas, suministro di koriente por kai bou di preshon. E riesgo di interupshon i suministro ta real. E situashon na Venezuela ta frágil, tin riesgo ku inkietut den region lo krese. Banda di esei tur aña tin menasa natural manera di orkan. Ademas a konsekuensha di seramentu di Straat van Hormuz na aprel 2026, rònt mundu a surgi peliger di eskases di kombustibel.


P'esei nos ta konsehá e gabinete lo siguiente:

- Disidí kua nivel di stòk stratégiko ta deseabel na Hulanda karibense, registrá esaki i disidí ken su responsabilidadat esaki lo ta.
- Sòru pa un stòk di komestibel i awa (di bebe) (ku e kapasidat di almasenamentu rekerí) ku ta kumpli ku e normanan stipulá. Ya komo tin un stòk regular limitá di esakinan.

### **Opinion tokante e resultadonan di maneho**

Den e investigashon akí nos a evaluá te na ki punto e resultadonan di e maneho di e minister ta kumpli ku e normanan stipulá. Nos ta konstatá ku apénas tin maneho i nos ta basa nos opinion riba e normanan internashonal pa stòk stratégiko. Nos ta hasi uso di un eskala di sinku punto: bon, suficiente, moderá, preokupante i masha preokupante. Nos ta opiná ku e resultadonan di falta di maneho pa stòk stratégiko na Hulanda karibense ta: preokupante.

## Opinion



# 3.

# Reakshon di e minister i epílogo di Algemene Rekenkamer

Riba 24 di aprel 2026 minister di BZK, tambe na nòmber di e sekretario di estado di BZK, a reakshoná riba nos informe konseptual. Akibou por lesa su reakshon. Anto nos ta sera e kapítulo akí ku nos epílogo.

## 3.1 Reakshon di minister di Asuntunan interno i Relashonnan di Rèino

E minister ta skirbi ‘Mi ta rekonosé boso konklushonnan ku no tin meta stipulá pa loke ta trata e stòk stratégiko na Boneiru, Sint-Eustatius i Saba, anto ku – sigun e definishon i norma apliká pa Algemene Rekenkamer – no tin stòk stratégiko.

Di otro banda ta asina ku na e islanan tin stòk regular ku nan por usa. Boso ta di akuerdo ku esaki pa loke ta trata kombustibel i remedi. Banda di esei ta konta ku den kaso di krísis, tin diferente sistema hinká den otro pa yuda i apoyá e islanan kaminda tin mester.

### **Awa di bebe i stòk di komestibel**

Pa loke ta trata awa di bebe, mi ta haña importante pa menshoná ku den Wet elektrisiteit en drinkwater BES a regla e kuadro pa awa di bebe pa den kaso di emergensia. Inspectie Leefomgeving en Transport ta supervisá esaki. E stòk di awa di bebe regular na e islanan ta limitá, ya komo aya ta produsí esaki for di awa di laman. Mirando e dependensia di e kadena di kombustibel i energia - den e konteksto akí - esaki ta e punto di atenshon. Manera boso a menshoná den boso rapòrt, pa kombustibel tin un stòk relativamente grandi. Méskos ku na Hulanda europeo ta bon

pa na Boneiru, Sint-Eustatius i Saba, wak kon robusto suministro di awa di bebe - en relashon ku diferente perturbashon i e sistema den su totalidat - ta.

Mi ta rekonosé ku suministro di kuminda na e islanan ta masha dependiente di importashon i di e interdependensia denter di e kadena di suminsitro. Den e kuadro ei presensia di sufisiente stòk denter di e fluho komersial regular ta un faktor importante. Boso estudio ta muestra ku ounke falta e asina yamá stòk stratégiko pa kuminda, na e islanan sí tin stòk regular di kuminda. Esakinan ta vária di aproksimadamente tres luna na Saba te dos/tres siman na Boneiru. Pa produkto fresku, lógikamente esaki ta mas kòrtiku, ku un promedio di un siman (figura 2 di boso rapòrt). Ademas den kaso di un krísis e islanan por pidi ayudo i asistensha. Alabes ta trahando pa fortalésé seguridat di kuminda, entre otro poniendo €24 mion disponibel den un fundashon. Ku e sèn akí ya ta estableciendo Stichting CariFoodFund pa tur seis isla huntu. Banda di esei lo sigui elaborá e elemento di kuminda den e kapítulo kontinuidat di sosiedat denter di e plan yamá Koninkrijks crisisplan Militaire Dreigingen (KCP-MD).

### **Dependensia di e kadena di suministro i importashon**

E gabinete ta konsiente di e echo ku e islanan ta fuertemente dependiente di importashon di merkansia i kuminda. Aproksimadamente 50% di esakinan ta bini di Merka. E polítika di komèrsio nobo di Merka i e inkietut den e promé parti di aña 2026 rondó di Straat van Hormuz, ta hasi e preshon riba e kadenanan logístiko marítimo, anto riba e vulnerabilidad di e islanan, mas grandi. Poko tempu pasá por a nota esaki tambe dor di e tenshonnan entre Merka i Venezuela. Den un grupo di trabou komun, e islanan outónomo i Boneiru, Sint-Eustatius ku Saba, anto e Ministerionan impliká na Hulanda europeo, ta mónitòr e situashon kuidadosamente. Anto ta trahando riba un eksplorashon tokante diversifikashon komersial i fortalesementu di e konekshonnan regional. Ta informá Tweede Kamer tokante esaki periódikamente via informe di progreso konserniente e agenda ekonómiko komun di e Ministerionan di Asuntunan Interno i Relashonnan di Rèino (BZK) i Asuntunan Ekonómiko i Klima (EZK).

### **Divishon di responsabilidad**

E sekretario di estado di BZK ta responsabel pa kordinashon di e Maneho di Rèino pa loke ta trata Boneiru, Sint-Eustatius i Saba. Tin diferente departamentu ku riba nan propio tereno spesífiko, tin responsabilidad pa Boneiru, Sint-Eustatius i Saba. Por pensa riba Ministerio di Salubridat, Bienestar i Deporte pa loke ta trata remedi. E Ministerio di Infrastruktura i Atministrashon di awa públiko pa awa di bebe. Ministerio di Hustisia i Seguridat ta karga e responsabilidad final pa maneho di krísis.

Tambe kada isla tin su mes responsabilidatnan. Boso konseho pa loke ta trata e maneho hibá ta mustra klaramente ku tin mester di un kordinashon mas skèrpi pa e responsabilidatnan akí. Mi ta di akuerdo ku mester tuma e pasonan nesenario pa ku esaki.

En estrecho koperashon ku Boneiru, Sint-Eustatius i Saba, e gabinete ta traha pa fortalés e kapasidat di adaptashon di e islanan den kaso di krísis, relashoná ku desaroyo geopolítiko i klimatológiko. Asina ta ku e sekretario di estado di BZK i e minister di Hustisia i Seguridat a duna òrdu pa hasi un análisis di kapasidat di krísis na e seis islanan. Lo presentá esaki anónimamente na Tweede Kamer den zomer di aña 2026. E investigashon di Algemene Rekenkamer na e stòknan stratégiko na Boneiru, Sint-Eustatius i Saba ta un komplementashon balioso riba esaki i ta fortalés e bista kompleto ainda mas.'

### 3.2 Epílogo di Algemene Rekenkamer

E minister ta rekonosé nos konklushon ku no tin stòk stratégiko na Boneiru, Sint-Eustatius ni Saba. E ta indiká ku ta trahando pa lanta CariFoodFund, anto ku lo pone kuminda na e islanan den e kapítulo di continuidad di sosiedat, denter di e asina yamá *Koninkrijks crisisplan Militaire Dreigingen (KCP-MD)*. Banda di esei e ta primintí pa inkluí nos resultadonan den e análisis di e kapasidat di krísis di e seis islanan. Ta trata di e análisis ku e - huntu ku e minister di Hustisia i Seguridat - ke kompartí ku Tweede Kamer e zomer akí. Alabes nos ta dedusí di su reakshon, ku e no ta bai tuma medida konkreto pa loke ta trata nos rekomendashonnan pa establese un nivel deseá di stòk stratégiko i pa yega na akuerdo tokante e distribushon di responsabilidat al respekto.

Esei ta preokupante, ya komo debí na e dependensia di importashon i dependensia denter di e kadena di suministro, e stòk stratégiko ta importante pa e islanan. Prinsipalmente pa loke ta trata awa (di bebe) Boneiru, Sint-Eustatius i Saba ta vulnerabel na momentu ku destilashon di awa (di bebe) for di awa salu, no ta funshoná mas. Ta trata di un senario realístiko, mirando e echo ku e stòk aktual di kombustibel nó ta e stòk stratégiko.

Na momentu di un krísis, esakinan por ta sustansialmente mas abou ku esnan aktual. Por ehèmpel den kaso di un krísis di petroli mundial. En partikular mirando e dependensia di e importashonnan di komestibel, e interupshonnan den e kadena di suministro por generá problema grave rápidamente.

Basá riba nos konseho tokante e maneho implementá, e minister ta rekonosé ku e mester tuma medida pa fortalésé su funshon di kordinashon. Sinembargo lamentablemente ainda nos no tin bista riba kiko e medidanan lo konsistí konkretamente, ni den kua lapso di tempu eseinan lo tuma lugá. Nos ta warda riba e detayenan ku masha interes.

# Anekso

## Anekso 1 Tokante e investigashon akí

Meta di e investigashon pa loke ta trata stòk stratégiko na Hulanda karibense, tabatin komo meta pa haña un bista riba e estado di stòk stratégiko di awa (di bebe), komestibel, kombustibel i remedi na Hulanda karibense. Ta asina ku Hulanda karibense tin un gran dependensia di abastementu eksterno pa disponibilidad di artíkulo esensial manera awa (di bebe), kuminda, komestibel i remedi. Debí na e ubikashon geográfiko, kapasidat di produkshon propio limitá, anto e vulnerabilidad di e kadenanan logístiko – entre otro manera konsekuensha di desaster natural, desaroyo geopolítiko òf limitashon di transporte - no por garantisá continuidad di e stòk stratégiko outomátikamente. Den e investigashon akí no a inkluí e aspekto di maneho di krísis.

E departamentonan i/òf e tres atministrashonnan públiko no tin norma propio pa loke ta trata stòk stratégiko. Pa e motibu ei nos a hasi uso di indikador ku ta basá riba norma konsehá internashonalmente, manera stipulá pa WHO, UNHCR, Sphere i Union europeo. Na momentu di evaluá nos a tene kuenta ku e konteksto lokal di Saba, Sint-Eustatius i Boneiru.

Pa haña kontesta riba e preguntanan di investigashon nos a hasi uso di e siguiente método: un lista di pregunta, entrevista, análisis di dokumento i bishita di e lokalidatnan.

## Anekso 2 Literatura

Algemene Rekenkamer (2022). *Focus op strategische voorraden*. 29 di sèptèmber 2022. Den Haag: maneho propio.

NOS (2026). <https://nos.nl/collectie/14009-aanval-venezuela>, bishitá riba 21 di yanüari 2026.

Wet voorraadvorming aardolieproducten 2012, <https://wetten.overheid.nl/BWBR0032775/2021-07-23>, bishitá riba 19 di febrüari 2026.

Wet elektriciteit en drinkwater BES, <https://wetten.overheid.nl/BWBR0037861/2023-01-01>, artíkulo 3.9 – 3., bishitá riba 19 di febrüari 2026.

Wet op de geneesmiddelenvoorziening BES, <https://wetten.overheid.nl/BWBR0028486/2025-01-01>, bishitá riba 21 di yanüari 2026.

E tradukshon akí na papiamentu ta un serviso di Algemene Rekenkamer. E teksto na hulandes ta e teksto ofisial. No por derivá niun derecho for di e teksto na papiamentu. Pa mas informashon pa loke ta trata e strategia, manera di traha i publikashon di Algemene Rekenkamer, por bishitá [www.rekenkamer.nl](http://www.rekenkamer.nl)

Algemene Rekenkamer  
Postbus 20015  
2500 EA Den Haag  
(070) 342 44 00  
[voorlichting@rekenkamer.nl](mailto:voorlichting@rekenkamer.nl)  
[www.rekenkamer.nl](http://www.rekenkamer.nl)

Foto: Associated Press,  
Matias Delacroix

**Den Haag, mei 2026**